

Communicaziun a las medias dals 6 d'avust 2024

S'engaschar per in ferm gaud da muntogna

Trais emnas, 45 juvenils: la Banca Chantunala Grischuna (BCG) ed il Project en favur dal gaud da muntogna han realisà quest onn per la dudeschavla giada las emnas da project ch'èn danovamain stadas in grond success. Gauds da protecziun stabils e durabels èn pli impurtants che mai en Svizra.

Las emnas da project han gì lieu quest onn a Cuira, Küblis e Glion. Ils juvenils da 15 fin 19 onns èn s'engaschads durant tschintg dis per la protecziun e la tgira dal gaud giuven e da las surfatschas naturalas protegidas. Els han construì sendas e saivs da protecziun cunter la selvaschina ed han sustegnì cun lur engaschi ils lavurers da gaud locals ch'èn engraziaivels per quel agid prezius: «A mes avis èsi impurtant da render pli enconuschentas als juvenils las tematicas gaud, gaud da protecziun e durabilitad. Grazia a quella savida chapeschan els ch'il gaud è in project da generaziuns, per il qual tuttas e tuts ston s'engaschar comunablamain», di Riccardo Siller, selvicultur e manader da las emnas da project en favur dal gaud da muntogna da la BCG.

La BCG ha realisà quest project da stad gia per la dudeschavla giada. Per la banca èsi impurtant da contribuir al bainstar dal gaud indigen, di era Martin Rust, manader dal sector durabilitad da la BCG: «Quant impurtant ch'il gaud è per nus sa mussa questa stad cler e bain. La protecziun cunter privels natirals ed il mantegniment da spazis da viver per numerusas spezias d'animals e da plantas èn indispensabels per la regiun.» Ultra da quai pussibilescha la BCG cun quellas emnas – ensemen cun il Project en favur dal gaud da muntogna, ina fundaziun d'utilitad publica cun sedia a Trin – a numerus juvenils da far in job da stad raschunaivel.

Il proxim project en favur dal gaud da muntogna da la BCG ha probablamain lieu la stad 2025.

Contact:

- Project en favur dal gaud da muntogna: Prisca Mattanza, pmattanza@bergwaldprojekt.ch, telefon +41 81 650 40 43
- BCG: Thomas Müller, thom.mueller@gkb.ch, telefon +41 81 256 83 11

Banca Chantunala Grischuna.

La Banca Chantunala Grischuna porscha tut quai ch'i dovra per ina banca universala moderna – per personas privatas, l'economia ed il maun public. L'interpresa cun sedia principala a Cuira è represchentada en passa 40 lieus en il Grischun. Cun var 1'000 collavuraturas e collavuratur è la BCG ina da las pli grondas patronas en il chantun. Sia attaschadadad al Grischun exprima ella en moda multifara. Ultra da sias activitads economicas s'engascha ella cun ses sponsoradis, ses fond da contribuziuns e cun sia lavur voluntara.